

Basel, 1. März 1550

An Joachim Camerarius d. Ä.

BSB, Clm 10370, Nr. 244.

Clarissimo viro, D. Ioachimo Camerario etc. Domino et amico suo obseruando. Leiptzgk.  
 S. P. D. Diu conticuerunt literae nostrae, Clarissime vir, vt, nisi constantia tua mihi nota esset, alienatum a me tuum animum esse suspicarer, qui, dum Norimberga exulo, nullis meis literis responderis, quarum vnas atque alteras, si non omnes, tibi redditas esse puto. Sed horum temporum turbas et occupationes sustinere culpam, facile patior, et oro, ne candorem meum ex maleuolorum obtrectationibus aestimes potius, quam ex re ipsa. His apud te fortasse nihil est opus, sed tamen quanta pestis sit ή διαβολή, κατηγορία τις οὖσα, ἐξ ἐρημίας γενομένη, τὸν κατηγορούμενον λεληθυῖα, ἐκ τοῦ μονομεροῦ ἀναντιλέκτως πεπιστευμένη, cum periculo capitatis et clade fortunarum mearum sum expertus, quas nunc perpetuis laboribus et aerumnis resarcire cogor. Ac Isocratem non fama sed fame impulsus, anno superiore edidi. nunc Demosthenem, qui te interpretem merebatur, ac fore spero vt infantia mea iritatus, hanc meam conuersionem (quod aequissimo feram animo) prorsus aboleas. Non enim, vt dixi, famae, sed fami seruio. Tu autem et nomini tuo et studiosis cum perpetua tua laude, inseruies. Orationem περὶ συμμωριῶν a te olim Tubingae dictatam, Oporino petenti dedi, qui nescio quas ἀνωνύμων quorundam καὶ δυσωνύμων peruersiones, me improbante, inculcauit. Tua verò illa conuersio talis est, vt talem nos habere totum Demosthenem vehementer cupiam. Quod si occupationes tuae nobis denegabunt, illud saltem a te impetratum vellem, vt loca obscuriora, et a me vel non intellecta vel parum latinè et perspicuè reddita, nobis declarare non grauareris, si non in meam gratiam (quanquam et ego tale officium ab humanitate tuâ sperare posse videor) at propter studiosorum vtilitatem. Nam Oporinus (cum qua melior conuersio interea prodierit) breui cogitat secundam editionem, eaqüe de causa exemplum ad te mitto, quod vt boni consulas, et veterem illam benevolentiam tuam erga me retineas, oro. Vale. Basileae Cal[endis] Martij Anno 1550.

Hieronymus Wolfius.

Si quid describere dignaberis, literas siue Basileam ad Oporinum, siue Augustam in aedes D. Ioannis Iacobi Fuggeri patroni mei, mittas licebit. Mihi enim breui in Galliam erit abeundum. Vale.